



Communicaziun a las medias

17avel Top Pop Rumantsch – Il mund dals siemis

Cuira, ils 18 da december 2008. – Il nov Top Pop Rumantsch ans lascha redudir in protagonist da la classa dal 99: Conradin Klaiss chanta ses «Mund magic».

Ellas èn zunt amiaivlas, las balladas che culan or dal clavazin da Conradin Klaiss. Per exempel lezza melodia ch'aveva serrà la cumpilaziun «Revoluziun – grooves rumantschs 99», la chanzun «sche ti carezas mei...». Bler è capità en quels diesch onns, er per il globetrotter sursilvan. Tranter auter in'intensiva scola da jazz en Nova Zelanda, absolvida en pliras periodas. La lavur d'examen ha lura gist generà ina nova chanzun. Tut las basas èn vegnidas registradas ultramar. L'ultim «schliff» però ha Conradin dà a Turitg, tar producent Manfred Zazzi. Puspè ina chanzun che sveglia siemis: Suentar ina fina scalinada entra la vusch, salida l'emprim ina «princesa» ed ans envida lura en in «mund magic». Ina gitarra sfranada lascha sminar ils miraculs apaina menziunads. In nov cas per las undas dal Top Pop, sco adina exclusivas en il Radio Rumantsch.

“Mund magic”

Bien di, cara princessa
Tarmettel bunas ord miu mund
Schi bi ch'ei dat tei
En tiu cor sas tgi ch'jeu sun
Seregordas, biala princessa
La notg vargada has ti viu
Miu segn da veta
Permiez il tschiel stelliu

Uss pren plaz en miu aviun
Neu cun mei en in auter mund

El mund da praulas e da ficziun
El mund da pur'imaginaziun
Neu el mund dils affons
Per in mumenet
Ti eis la rosa,
Jeu tiu prenci pignet
Maun en maun lein semiar
Nos cors colurar
In mund magic
Ensemen crear
Emblidar ils quitaus,
Sefermar, far in paus,
E lu viver...
Viver cun pissiun
En quei mund che nus creein

E lu viver...
Viver cun pissiun
En quei mund che nus vivin

Musica, text, clavazin & vusch: Conradin Klaiss
Battaria: Mara Churcher
Bass: Dave Crosson
Guitarra: Nick Burson
Chors: Silke Schmeing
Maschaida: Manfred Zazzi, Apart Turitg

Conradin Klaiss, naschì l'onn 1976, è creschì si a Danis en Surselva. Il clavazin classic ha el emprendì a chasa, il blues d'in camarat. Suentar ils studis da scolast secundar a Friburg ha el fatg substituziuns, entaifer ed ordaifer la Rumantschia. E tranteren ha el absolvì ina scola da jazz a Christchurch en Nova Zelanda. Las cumparsas musicalas èn stadas fin uss plitost casualas, bars, nozzas, vernissaschas. In'atgna band futura n'è dentant betg esclusa.

Per ulteriuras infurmaziuns:

Jachen Prevost, manader redacziun da musica RR, tel. 081 255 75 75, jachen.prevost@rtr.ch

Top Pop Rumantsch è in label per purschidas innovativas ed unicas en il program da musica da RR. Las emprimas dudesch chanzuns da la retscha èn cumparidas sin il disc cumpact «Top Pop Rumantsch, Vol. I, 2005-2007», da retrair tar: Radio Rumantsch, Via Masans 2, 7002 Cuira, u: www.rtr.ch.